



三郎稿天

果齋  
新谷

16  
2316  
1

卷三





2316  
1-3

三節稿序



邵子曰成天下事雖死天  
下事易然自古及今其難  
者何多而其易者反少何  
也蓋死惡物也苟非辨於義  
者甚哲養於中者有素則於

三節稿序



星乎威武怵於外利害誘  
於內而忽不知其所惡有甚於  
死者夫豈在星則吾惑乎易  
者之反少也吾降俗末其少  
者豈益少而惟本朝果齋  
尹公祖孫則可異焉蓋我

宣廟萬曆壬辰倭奴入寇公  
從巡邊使李鎰進禦于尚  
州鎰見賊盛跳玄曰願君從  
我公與朴公筭堅坐幕次曰  
將無以見主上男兒到此為  
國一死足矣遂死之崇禎丙



子之寢及其孫藺谷公出守  
南陽募義士將討賊之裨至  
公抗賊奮雷罵而死先是朝  
廷既以天無二日之義謝却  
傲使而復議通好公守林溪  
公極言不可未幾 行在勢窮

廟議以公及一二守義臣謝敵  
人公遂與數公不在而死曰吾  
只知有 皇上而已我 孝宗  
大王元年 上曰尹某兩世三人  
俱死於節豈不貴乎其子孫  
收拾兩世三稿詩若文取 宸



將名之曰三節要之此三稿既俱  
是少作而果齋則又兵燹之  
餘只搜其赴京酬唱於他人  
集中故尤不克其寂寥惜哉  
余因竊惟帝降衷立人之  
道曰仁典義而已然仁莫大於

父子義莫重於君臣而所在致  
死者以其分定故也噫孰無是  
心而倉卒之際喪其心而滅其天  
者陷之矣宜乎其少之又少而至  
於間數世而一有焉而果齋祖孫  
世濟其美以全其性而至於林溪



所統則有大焉夫以東偏之一秀  
才乃能扶天下之大義對天下  
之風聲不獨于光於乃祖乃兄  
而使人之者皆知世間有聖人掌  
制之大法則夫其所成者豈彼  
達功立事者之彷彿於萬一

哉而其必萃於一家為祖為孫  
為兄為弟則其世類之所係  
而不可誣矣况 聖考綸音炳  
若日星則此稿雜典叙秩典  
禮同於五弊可也果齋諱暹  
字汝進新谷諱榮字信伯



而譚集字成伯者林溪公也  
果齋有學問文章為粟谷諸  
賢所推重二孫之淵源因亦  
可見矣時橫艾困敦仲春日  
息津宋時烈叙

### 二節稿序

雲山尹使又以此  
余二節遺稿微  
以序文三節者以  
果齋公死士庶之



三賢道和厚  
生於藜藿林溪而  
公能丙子之能教  
祖如先者具死於  
節鳥呼田民之門  
是河首即士之多

也昔教大沙罵  
孝希列曰汝不  
潤馬也為祿也高  
死者教了未了乎  
乃五百先也志



言多義我烈之至人  
凜之有之生之氣今  
尹氏三首之奇  
愧お古古人夫余雖  
不及見之里高

上之林溪則以  
之面之信伯乃  
余神交也嘗為  
之在兄之辭上  
有題朱身方高



子秋滄海上精  
衡是正聖之  
詩信白朝夕吟  
通海時意謂保  
然今以觀之豈

地之正感其力  
勿然耶一也夫  
且正特立者且  
卓之則文章車之  
美及正餘中



勿讀之文也  
相心三子之為  
人矣是為序  
主子月日也  
實鄭斗姆考

三節遺稿總目上

卷之一

果齋

詩

策

卷之二

薪谷

詩

卷之三

薪谷



詩

卷之四

薪谷

教書

不允批答

三節遺稿總目

中

卷之五

薪谷

疏

卷之六

薪谷

劄

卷之七

薪谷

啓辭

三節遺稿總目下

卷之八

薪谷

策

說

卷之九



林溪

詩

卷之十

林溪

疏

劄

啓辭

策

說

三節遺稿總目終

三節遺稿卷之一

果齋

詩

詠寬心臺示上使俞松塘

泓

萬曆丁亥  
朝天錄

望遠登高岸澆愁酌叵羅川平秋水渺山迥暮雲  
多珠粉三行艷驪駒一曲歌歡遊寧恟病風日政

清和

天畔笙歌咽罇前萬里情水村迷似畫郊路坦如  
枰作客偏耽勝寬心合揭名夕陽人欲散風送暮  
江聲



道上偶吟四十韻仍示松塘求和

圭璧通周道偏非間楚滕衣裳雖異制禮義素多  
稱專對才誰合 皇恩海與弘星槎河外放雲綉  
日邊承頭戴三梁劣心冲萬里鵬江灘頻跋涉關  
嶺幾攀登北望長拱斗西歸幸得朋眼青逢勝境  
臘白見休徵曲曲珠箴岸重重玉綴陵藍田疑處  
處銀闕湧層層詩續貂中狗身如驥上蠅畏途身  
豈倦違藥病還仍柴户來投軻烟床卧曲肱折綿  
驚朔吹穿壁暈篝燈毛幌晴霜結綾裯曉靄凝獸  
炭噓易滅烏骨借難能枕共龜眠縮魂隨蝶夢騰

司晨三叫罷促角五更興短髮寒梳雪清泉冷漱  
冰囊金酬賃罄軒幕戴星乘溪間深湍凍林冥宿  
霧蒸地喧兵始動山霽旭新昇瓊屑封鬚角嵐光  
散屋<sub>乃</sub>轡稜峯圍螺疊疊石滑馬兢兢樓鳥爭趨  
壑劬雉遠避曾緣崖幽築店曰樹蠹成棚塞晏孤  
村靜城殘古壘崩戍臺餘粉壁蔓草被沙壘久喜  
狼烟息疇虞鐵騎凌開厨沿水穩尋刹捨車升絕  
壁懸孤塔荒祠住老僧稚童驅野犢獵客臂秋鷹  
異語聞難質華音學未曾竒觀千狀併吟料十分  
增陟站頻回首思家暗拊膺夜垂鮫淚迸鄉斷鴈



書憑逐歲人空老  
攻愁酒易勝  
遼陽遙訪古仙鶴  
儻回翻折柳  
悲聞笛踐沙  
訝裂繒遠遊  
堪作賦聊復刮溪藤

道上吟五十韻示松塘

荆州初識面白首  
喜窮經點額攀崇級  
賓周屬暮齡詞源深似湧  
膏海淡如涇壤莫憂遼  
豕霜蹄選魯駟十行綸貫日  
三尺劔凌硯紫氣應絙斗  
蒼猪正旅丁朋鐔懷北海  
仙路隔東溟完璧須忠信  
回天倚典刑可伸萋斐痛  
寧望鼎鐺銘附尾輕千里  
冲霄奮二翎爪要瓊佩報  
鍾會軫音聽才調慚儀

鳳書功茂聚螢志恢凌  
迅鵠機淺笑飛鼉夙願諧  
觀樂初心快建瓴八關  
頻問禁乘嶺幾摧筵卸轄  
投溪店催裝趁曉星枕  
欹眠縮頸林撼爽侵櫺角  
吼知軍動雷休認客醒  
玉鉏傾暖醕銀蠟滅寒熒  
魂斷城邊笛身飄水上  
萍彩曠烘凍鬣斜逕軼行  
輶蘇塔緣崖直矗松潭繞  
舍渟迷津宜發歎下瀨孰  
求寧水峽回湍急沙洲攬  
轡停神勞心畏道病減  
藥通靈試涉千般險恒存  
一念惺穀棚依寵樹湖  
郭抱村垆刀斗今無警  
關門夜未扃方欣邊圍壯  
何慮塞雲腥油幕閑  
貔貅天威戢震霆市孩調語



澁粧女掃眉姪畫壁縣官砌雕樓壓成廳驅車穿  
粉堞駐旆憇烟汀沙磧經秋白風帘拂晚青巖竒  
蹲虎狀山活舞虬形宙束森森戟嵐飄曲曲屏人  
磨肩偏側馬蹶足伶俜勢絕星河近平臨霧壑冥  
碧鱗鋪鑿鑿玄玉踏玎玎魚貫通函谷蛇回出井  
陘鄉園思杳杳夕照下亭亭衝雪欺孤貉逢原戀  
鶴鴿晨昏誰問寢詩禮阻趨庭池草空連夢江梅  
欲散馨悲吟生越響羈跡向堯廷擬獻三呼祝看  
添一葉萸竹風遙可挹鶴語更堪聆愁繞鯁岑月  
興迷鴨水舫戰肱寒粟遍酸眼冷珠零作客偏多

苦長歌隰有苓

頂石山

岩峴名頂石形勢控千山茅店雲邊迥樵童雪裏  
還嵐浮青靄靄溪合碧潺湲花柳歸時興春風擬  
一攀有峭峯在望名曰千山

通遠堡

陰崖深尺雪寒吹透藍衫路入三關險山圍百仞  
巉巖囊詩已富愁堞酒能剗跋涉休言苦朝宗見  
至誠

長河知幾渡陽岸少停驂寬恨杯傾百離家月遽



三心常拱斗北身獨滯江南陟岵歸雲暮鄉愁不自堪

過張真廟

樹老層崖上荒涼古廟幽短碑留十字孤塔閱千秋佛豈空中聳人無理外求逢僧仍解說川畔少遲留

踰高嶺

盤回登蜀道遠客涕先零秀嶺沾銀漢晴崖展玉屏棧長通絕壑林密礙行軒越險尋孤店寒烟一抹青

宿懷遠驛

昔是辰韓域元稱地勢雄壤接龍灣盡榜連鯨海窮麗失三關守唐誇萬里功尊周誠豈缺圭帛至今通

高橋鋪次松塘韻

晚郊烟樹路微茫驢背寒吟費短長萬里東流滄海濶春風幾日放歸航

塔山鋪

午飯于甯氏家問甯戚子孫則曰不知但其祖為邑宰有圖

輕綃一幅掛垂門指點安平舊使君無復青氈傳世業摩挲唯見十行文



路逢冬至使先來通使付家書

萬里人逢故國臣一封書寄北堂親看雲步月無窮意行邁忽忽不盡陳

釣魚臺

波頭百尺聳孤臺磯上千秋滿碧苔忘機有客今何處鷗鷺雙雙自去來

廣遠樓次松塘韻

倦客登臨天畔樓眼穿雲樹却懷憂流霞北海蟻初漱暮雨西山簾半鈎久隔晨昏難紓恨只耽形勝強爲遊歸來萬里堪衰鬢莫道觀周尚黑頭

上使戲贈李娥代李娥戲答

春宵幸共鴛帷夢舊意深盟肯暫忘逢首多時空掩淚江雲渭樹幾回傷

洛浦分携問幾年自憐秋夜廣寒眠天教繡節重來到却喜餘生再有緣

情似蠶絲抽不斷吟來瓊句感還深楚雲未復陽臺會枉信當年一寸心

重逢今夕亦難親八字愁眉謾自顰誰似茂陵長卧病至今猶道薄情人

遲留還惜客程餘無限陽關一曲歌聞說西州多



三言遺稿卷之一  
六  
舊面真緣底處未消磨

奉 皇敕及會典回程至山海關主事馬  
維銘贈詩以送仍次其韻

白日無私煦葵傾只寸誠關通宗海路星壓伏波  
營鳳綸輝聯璧壘燄色集鷲東韓千載慶汪澤徹  
幽明

賓周輕萬里唯仗畏天誠朔雪關道春風漢塞  
營才慚觀樂札身似出幽鷲幸覩新綸渙三韓日  
月明

附元韻

馬維銘

國王共 帝命貢獻獨虔誠曉騎隨秦驛宵駢  
度漢營上林瞻繫鴈長樂聽啼鷲歸去無煩頌  
天朝自聖明

附次韻

松塘

雨露天恩渙玄黃效遠誠幾虧關北月重過海  
西營星座瞻陽鳳鄉愁惱曉鷲揮毫酬秀句才  
調愧三明

黃麻宣九闕白日照微誠漢市新豐酒秦城細  
柳營鄉程多逸與珠曲送嬌鷲鴨渚春應好烟  
花十里明



宣廟御製

備忘記曰萬曆戊子春謝恩使一行回遼山  
海關主事馬維銘贈送以詩俞泓尹暹等遂  
和二首夫俞泓等之是行也艱關萬里殫盡  
一心手奉 綸音親筆寶典變禽獸之域為  
禮義之邦是吾東方再造箕疇復叙之日也  
可使其詩泯滅於後予為是惜爰命詞臣各  
次其韻詞臣反歸功于予是計不也辭害義  
可無言夫詩以言志他不足計不以辭害義  
也可

宗祊今始正莫謂是予誠列祖功曾積諸賢悃

幾營息沾同大造歌競及流鶩願守區區志千

秋戴 聖明辨群臣欲加徽

對策

王若曰當世之務可言者多矣姑以禦敵

一事言之不過曰足食足兵兵食之外

亦有先後本末之可言歟尹吉甫贊周

以北伐只言孝友之張仲襄度相唐以

東討只去姦邪之元稹諸葛亮於出師

表惓惓以賢臣小人之說夫君子小人

於用兵之間若不相及而數子深以為

憂而不及兵食何耶李綱之為高宗謀

也亦引此為言而必以先正朝廷為本

其意安在設使能辨別賢邪以正朝廷



而國無兵食則將何以戰守歟 予以  
否德叨守丕基方切悔予之歎未得濟  
艱之策邊烽驛遞報急相望師老塞上  
奏凱無期予不克知由予左右臣所以  
告予者非嘉謨嘉猷抑兵糧告匱備  
禦踈虞雖有智者亦無如之何歟於前  
數子之說有所未盡而然歟如欲正朝  
廷以禦外患生民奠枕措國勢於泰山  
之安則其道何由子諸生其各悉陳之  
子將親覽焉

臣對臣聞制亂禦侮之有備而其備不在於邊圉  
足食足兵之有本而其本不在於威強蓋軍儲備  
之當先朝廷本之所在苟能宅賢而條明之正心  
而進退之則其本既正其備自飭其於應敵乎何  
有恭惟 主上殿下以續服無疆之聖戒有戎勿  
恤之道恭已南面業業於內治貽憂北顧汲汲於  
外攘念悔禍之遲而猶軫乎備之不飭思制變之  
宜而尚慮乎本之不正庭集芻蕘策詢古今誕恢  
翕受之誠俾進畢達之懷臣實昧昧寧足以奉揚  
雖然威顏密邇言路洞開蘇軾敢言正在今日則



三管通和卷之二  
九  
敢守交淺之戒以負虛行之聖意乎 聖策曰自  
當今之務止何以戰守歟臣竊惟圖國家之治者  
有緩急之務其務也多端其要也不一而邊鄙之  
多聳是當世之鉅憂則所務固在乎備禦之道而  
其要不過乎兵食之足而已夫兵者國之爪牙也  
食者兵之命脉也國資乎兵故兵之克詰而寇略  
遏焉兵資於食故食之乃積而饋餉贍焉非兵則  
不可以耀武非食則無得而宿飽兵食之於禦敵  
固其大矣雖然朝廷本也兵食末也其本既亂而  
末治者否矣則欲兵食之裕而知先後之分者蓋

亦先正朝廷乎夫朝廷天下之大本也登俊又而  
明進退然後可以正四方四方正而萬事理古之  
人有見乎此故興六月之師獻三捷之功者周之  
吉甫也而孝友之賢協力內修則有燕喜之誦痛  
逆豎之亂起幽鎮之討者唐之裴度也而翕訛之  
姦將構厲階則舉屏黜之典至於竭循國之瘁抗  
出師之表者亦以進退賢邪惓惓於終始諸葛亮  
之心夫豈他哉噫乎利有厲忌克竊位則內蝕其  
治而外溥斯害淑慝之別其可緩乎此數子所以  
推本而殫言者也逮夫宋高之時金虜匪茹陸梁



於邊薰猶未別混淆於朝于襄之策以是或踈則  
李綱之說亦與數子同符而相仍矣噫六師張皇  
猷之克壯者實由元老之協力百穀時播食哉惟  
時者亦由吉士之若采則兵食之足豈在於別賢  
邪正朝廷之外哉伏願 殿下留念焉 聖策曰  
自予以否德止其道何由臣伏覩 殿下宵憂旰  
勤而懷綏之道靡不畢講遠樂近來而輯寧之德  
罔不覃被來王之周治率格之舜化在今可見而  
夫何整居焦穫者乃敢執迷於聖代乎自由犯順  
以來全城見燹血死之耻未雪居民被掠侮予之

歎未絕邊烽驛遞羽書星馳師老千里奏凱無期  
臣不敢知帷幄籌臣罔以訐謨借筋於 殿下而  
思進清邊之策耶抑庚癸有呼兵多倚矛綢繆失  
策勢屬踈虞而雖有智者不能爲之謀者耶臣聞  
外侮之孔熾由於內治之舛亂內治之不嚴由於  
庶職之瘵曠今也張仲之孝友人皆自勉元稹之  
姦邪世旣無見而進退之際致珉玉之或混舉措  
之間有是非之或亂智以之箴而政日厖官不惟  
人而績日隳則如是而兵食之欲裕邊鄙之欲靖  
者不亦難乎嗚呼諸葛之言固可法矣而李綱之



憂今亦有之伏願 殿下以明闢之德勉正心之  
道外比於賢而登庸之旁招其吉而克宅之勿以  
賢愚而同條勿以妍媸而混跡器使而俾展其才  
羅致而不遺其實惟賢焉布位惟能焉在職則旋  
別之道盡朝廷自正於上矣朝廷正而百官正百  
官正而四方正天下之事無一不出於正矣以之  
禦外侮則寇亂自遏以之裕兵食則軍儲自贍何  
憂乎備禦之乖宜而邊圉之有警哉伏願 殿下  
留神焉 聖策曰子諸生云云臣聞天下之事其  
本在於一人一人之身其主在於一心一心苟正

焉凡所以用賢也幹事也莫不出於正而自無壞  
亂之弊矣伏願 殿下維持此心而敬以養之涵  
養此敬而夕以惕之無使私意間之邪念蔽之則  
此心當正而天下之事可以無不正矣臣干冒天  
威不勝屏營之至臣謹對

三節遺稿卷之一



三節遺稿卷之二

薪谷

詩

次陳子昂感遇詩韻三十六首 遺間錄

卧病掩席門不覺朝日昇起視籬下菊淒淒露華  
凝百物共凋悴悠然感慨興朗詠秋懷詩前言亦  
可徵

木落天地蕭孤松猶自青荷花抱香死碧蕙摧微  
莖秋氣日淒淒感物傷我生平生丈夫志濶落終  
無成



日月有盈虧天地無全功忽忽百年內空懷寸心  
忠荏苒歲將暮居然成老翁長歌懷古人惻愴情  
未終

浮世日曉曉是非長相蒙人情異炎涼交態變始  
終百年苦易滿白日難再中可憐楊朱子徒然泣  
路窮

悲歌宇宙間吾道嗟已矣我有一張琴清音協正  
始鍾期久已死千載無此耳不忍奏今樂以媚  
衺子

芳蘭在空谷馥郁香氣清地幽人不鋤日夕秋風

生榮落不足歎天道有虧盈採採動盈掬孤懷鬱  
不平

大朴日已散萬事良悠悠自我落塵網歲月知幾  
周守拙歸田園烟霞足一丘寬閑愛吾廬不換萬  
戶侯

昔有孟浩然平生坐詩窮余生千載後景仰欽高  
風自是傲軒冕何須抗塵容寂寞歸樊廬榮辱任  
天公

混沌本無象末俗爭嗤嗤達士覩玄機超然拔等  
夷且與惠好同歲晚相携持尚友卷中人昔賢不



吾欺

不羨趙孟貴拖紫而紆青但慕獨醒翁種菊餐落  
英舉頭望白日天門雲氣暝將營紫河車閉門讀  
黃寧

黃塵鎖朱絃何時發陽春楚璞人共棄燕石世所  
珍惻愴何足道蒼茫聽大句終日默不言豈是無  
心人

乾坤莽空濶吾道成蹉跎白日已云暮青陽能幾  
何登山斲靈芝滌場收嘉禾仰視雲間鴻冥冥超  
世羅

挂冠歸故園偷閑養天和山深忘盥櫛地僻少經  
過欲浪已帖息心鏡要刮磨笑彼服箱驥嗟嗟奈  
爾何

素無適俗韻富貴不能淫蹤跡謝城市雅志在山  
林宿鳥戀故林孤雲出遠岑悄悄日將夕長歌梁  
甫吟

美人隔河漢已誤黃昏期常恐花鳥闌脉脉頻雙  
眉日月不我與青春能幾時輾轉不成寐孤燈照  
羅帷

青軒桃與李灼灼含春姿韶華謝我去顏色非昔



時霜風一披拂病葉鳴前墀客有感物者獨生千古思

戚戚悲素絲悠悠泣窮途卞和幾刑足屈子徒捐軀所以耿介士卷跡歸山隅入林斫柴薪歸來煮酪奴永懷獨不寐山空秋月孤

朝辭白玉樓暮過琅琊臺逍遙大荒外竒遊何壯哉赤松日招邀乘風任去來紅塵一失脚雲山遠崔嵬何當鍊丹砂留舄登蓬萊

白壁何皎潔青蠅遂相欺騏驎困鹽車含冤摧兩眉緬憶黃金臺千載不同時山中金石交宿契無

磷緇欲往從之遊五噫垂滄溟

夜久羣動息宴坐空持頤笑彼名利兒是非爭疑疑我心如風纛搖搖不自持欲挂弘景冠肯作毛遂錐尊鑪今正羨歸及秋風時

浮世忌太潔明君棄不才仙人不我遐携手遊蓬萊仙區日月長照耀金銀臺飄飄入無倪恣籠氣佳哉俯視九州間茫茫但烟埃

天地爲逆旅萬期真須臾人生處其間草頭露爲珠願得長生籙去訪安期徒六瑚與八簋視之猶塊蘓鶴背御冷風來遊洞庭湖



達亦不足夸窮亦不爲患窮達皆外物與我不相  
干侯家富薰天七貴相交歡流水接華軫榮枯隨  
片言萬人承燠灼生死輸心肝一朝成丘墟烏雀  
啼悽酸

絕代有佳人嬋娟遠山眉嫁與少年子共結百歲  
期奈何輕別離令人垂涕淚青春忽焉過秋霜摧  
紫芝欲往從之遊水濶挈龍螭天長消息斷行李  
今安之

平朝攬明鏡颯爾雙鬢衰悲歌擊玉壺寂寞壯心  
違俯仰宇宙間泣涕空漣漣天道有虧盈人生無

定期有酒不能飲應爲達者嗤西日不相貸行樂  
須及時

軒羲去已遠吾道誠艱難宵人方翕赫紛紛恣欺  
謾兒戲不須說歸來卧江干掉頭謝流俗老農相  
交歡富貴視浮雲功名夢邯鄲逍遙秋月下擊節  
空長嘆

天馬出冀北磊落房星精雙蹄削寒玉倏忽無留  
行平明刷越雋亭午馳幽并伏櫪志千里逸氣凌  
四溟奈何服益箱艱難幾飽經玉山有靈未誰能  
採其英



我有一茅屋脩然無世氛屋前有流水屋後有白  
雲只可洗我心豈可持贈君於焉自偃息研精觀  
秘文世道日相違涇渭誰能分昂昂出塵鶴豈肯  
隨雞羣

伯牙絃久斷不復奏雲和我懷自曠蕩與世不同  
料縱欲強諧俗其如素性何鴻飛何真真不復嬰  
虞羅擾擾名利兒何殊赴燭蛾以茲悟生理怡顏  
眄庭柯

少小尚儒雅優遊翰墨林許身何太愚早比雙南  
金誰知松栢操競愛桃李陰冉冉老將至秋霜生

衣衾緬憶武陵源蒼蒼何處尋落日空佇立仰慙  
歸巢禽

夜來化爲蝶偶入無何鄉邂逅廣成子逍遙汾水  
陽遽然夢忽覺仙山何渺茫瞻望不可及流淚空  
霑裳羞與世上兒白首干侯王兀坐玩物理兀楚  
誰存亡

楚國青蠅多誰知荆璞真寧爲刖足鬼不作搖尾  
人我欲叫閻闔天路將何回不如歸江湖日與沙  
鷗親秋風入漢關秋色滿函秦無錢對菊花愁緒  
亂如麻



福乃禍之基得乃失之門趙孟不爲貴卞和不爲  
冤周蝶孰是真允楚孰是存悠悠大夢中紛紛難  
具論自家有樂地活水有真源此理微且妙難與  
俗人言

世道日以降何時還復元擾擾季葉人營營難具  
論於利競秋毫薄夫無由敦但識名與利誰知吾  
道尊索錢又多門政令何其煩安危大臣在籩豆  
有司存吾徒幸無事終日醉昏昏

四序相推敝蓐收行清秋白日已云暮斜暉半城  
樓落落別知己誰與同遨遊自歎身世拙命與時

爲讎少年倚豪橫志氣凌九州居然徒獲落歲月  
空悠悠秋霜忽滿簪把鏡還自羞長歌一尊酒何  
須萬戶侯

務光讓天下清風激羣生奈何今之人錐刀日相  
爭勢利相傾奪紛紛孰輸贏達者洞玄象五噫別  
神京墻角短檠棄野渡虛舟橫朝詠梁甫吟暮作  
猛虎行詩壘屹開張森羅擁墨兵憂天效杞人形  
枯頽楚醒頽陽落西海奔流走東溟愁憂無端來  
長歌意悠哉

逢江都客



君自江都至何日發燕尾我家北砌花幾枝含淑  
氣貞松猶自保竹色應不改吾將拂衣去白鷗遙  
相待

與客醉後謾興

孤城枕海勢逶迤十里湖山盡樣奇夢入形闡天  
北極身隨皂蓋日南陲公餘宴客吟周雅關外招  
魂唱楚詞徙倚曲欄江月白一場盃酒亦 思私

栽松

霜後貞姿性所憐雨餘移植草堂前枝柔未作蒼  
龍化葉小何堪白鶴眠今日孤根真得地他年直

節可擎天傍人莫道材猶弱會見清陰庇九壩

挽崔應教惠吉室內

千秋亭畔賦初成舐犢慈懷病轉嬰翠篆已消猶  
有恨朱絃中斷更無聲忍聞稚子呼天慟叵耐孀  
親隔海情惟是潘生孤影在人間誰與喚卿卿

金陵郭外過李居士家次錦溪相公韻

唱錄

是非榮辱兩無聞長占烟霞絕世氛得意山禽時  
喚友無心野鹿自成羣風含翠篠東西戛天入清  
池上下分對此剩知塵外趣挂冠吾亦謝青雲



露浥秋荷水滿塘獨凭松榻晚風涼苔深石老烟霞古山靜人閑日月長綠竹橫分淇澳色黃柑時送洞庭香一罇酒盡林光暮何處歸來醉是鄉

曉倚江樓次壁上韻呈朗山倅

作客湖南地盡頭岸巾清夜獨凭樓五更星月涵滄海十島風烟接素秋莫歎久爲邊邑宰不妨仍帶醉鄉侯一聲畫角江天曉側耳那堪去國愁

送內弟黃子由原之任興陽

昔我離君赴道康今君別我宰興陽去留懷抱同前後出入恩榮共弟兄屈子秋蘭吟澤國謝家春

草夢池塘懸知游刃恢恢地贏得琴堂吏隱名

送姜公獻瑜赴湖南佐幕

曉日初辭玉陛前郎星已耀斗南躔離亭積雪仍含凍驛路寒梅欲吐妍千里客懷明月遠五更歸夢白雲邊知君定過高興縣願寄新詩報惠連

送洪元老命者之任安東次鄭兄德基維

城韻贖之

綠綉膺檢別神京皂蓋翩翩嶺外行文彩幾年承寵渥板輿今日亦恩榮離愁驛路春將晚歸夢龍墀月正明聞道庾公遺愛在莫令千載獨知名



送朴學魯日省之任咸平

秋晚離亭五馬鳴  
大家今日賦東征  
文星久煥銀臺直  
惠雨應隨皂蓋行  
別恨三宵孤月白  
客程千里暮雲平  
春來儻寄相思字  
試聽江洲有鴈聲

送鄭兄德基之任順天

莫向離亭愴別情  
江南勝事最難名  
雪晴東閣梅香動  
月照南軒竹影清  
壽席應拚三邑會  
彩衣齊舞二難并  
自憐舊日金陵守  
愧殺林烏反哺聲

送洪豐寧君實出尹完山

昔過湖南第一州  
偶乘清興辦奇遊  
分明寒碧堂

前月近接金山寺裏秋  
塵土祇今勞夢想  
酒盃何日更遲留  
聞君作尹名區去  
浩蕩歸心逐水流  
製錦治繩屬望優  
暫辭獬閣典雄州  
俗稱豐沛遺風在  
人道儒賢舊澤流  
撲地間闔應按堵  
沸天簫鼓復登樓  
秋來准擬隨公去  
物色分留待我遊

送茂長使君

昔騎駘馬出湖州  
駐節長沙爛熯遊  
地僻青山橫北郭  
夜深明月照南樓  
石灘野水千年在  
渤海層波萬里流  
塵土邇來勞夢想  
羨君今日作遨頭

送北評事



芙蓉帳下得英髦，要使邊人識鳳毛。地接黃沙雲  
片濶，天臨碧海月輪高。探花杜牧風流遠，草檄陳  
琳意氣豪。今日送君歌出塞，匣中時復吼龍刀。  
北顧憂深輟從班，文星已照塞天端。宣威虎帳軍  
容肅，飛檄龍堆虜膽寒。聚散共驚春夢乍，去留俱  
惜夕陽殘。懸知一片雲間月，他夜分明兩地看。

送靈巖使君

南北東西路有歧，十年離合夢依依。纔拚宦海浮  
萍會，又作郵亭落葉飛。別後分明孤月遠，望中迢  
遞暮山微。臨盃莫恠頻相勸，春盡江湖鴈亦稀。

名區千里要循良，鳧舄今朝告別忙。太守官衙通  
節制，海藩形勝壯關防。西郊尚恨園林隔，南國何  
堪道路長。塵世相逢何日是，春風回首獨彷徨。  
湖南曾是客中過，月出山高發興多。頭上老星低  
可摘，眼前溟海小如渦。微茫樹色分瓊島，縹緲雲  
光接漢挈。今日送君還作宰，爾來風景復如何。

次子由韻

不識陽原路，今知火石津。看君青草句，疑入洞庭  
春。

雪夜戲次李雙溪景奭韻



沉冥莫愛酒盃深憂國要須只細斟乘雪訪君那  
可得直愁肌骨苦寒侵

附元韻

昨夜歸來恨轉深清罇不得對君斟新詩詠罷  
襟懷爽亦有蓬山雲氣侵

喜人見訪

一笑相逢失百憂指揮童子掃庭幽黃塵久鎖迎  
徐榻白雪應催訪戴舟浮世除詩皆外物暮年唯  
酒是良籌不嫌山野無魚味細酌豪吟盡日留  
閉門西郭歲將闌隱几孤吟岸鷓冠浮世白頭交

誼薄故人青眼酒杯寬氣通蘭室何曾餒盟結騷  
壇久未寒莫道家貧供給少一區風月共君看  
多暇詞林得暫陪滿庭詩景故相催天寒雪色猶  
封竹臘破春光欲漏梅虛室未曾迎客坐孤懷唯  
獨對君開成都笑殺垂簾老不向山陰霽後來

次子由林泉偶成韻

空簾寂寞閉幽情却悔真塗摘堦行寒士食貧寧  
是病達人論道貴無名自憐蓬鬢隨年改謾有葵  
忱向日傾倦鳥投林雲出岫靜中觀物悟浮生  
睡起蒲團午夢醒淡雲拖雨過江城衰年病酒風



流減苦思緣詩太瘦生花落小庭唯鳥語草遮微  
逕少人行慙慙爲報紅塵客蝸角功名且莫爭

次象村忙字韻三首

閑情却笑野雲忙卧病林泉數月強卒歲家資無  
甌石引年仙藥有昌陽風翻竹砌千竿玉雨浥花  
叢石和香門巷雀羅車馬絕江湖魚樂貴相忘  
纔到閑來便覺忙高張詩壘墨兵強敢將魚目同  
明月自是螢光讓太陽大手許君才子海風流慙  
我令公香秬緣未報 天恩重憂樂何嘗一飯忘  
陰陰綠樹送春忙養拙田園效辟強任是芝蘭長

在谷只憐葵藿謾傾陽山嵐入座琴書潤野藪登  
盤匙著香將老關心唯藥物悠然身世已相忘

次東坡隆字韻述書

世承雷漢 聖恩隆清白傳家有舊風三黜不曾  
傷柳子一園聊自樂溫公功名撥置浮雲外歲月  
消磨醉夢中獨閉荆扉常閒寂壁間龍劍吐晴虹

次東嶽入日辰字十韻

青陽回薄屈良辰勝裏金華不受塵攻破愁城唯  
有酒恢張詩壘任驚人氣充天地何嘗餒語帶烟  
霞轉益真可惜年光隨水逝尋花問柳莫辭頻



久作郎官應列辰幾年乾沒軟紅塵堪悲歲月空  
催老轉覺簪纓解誤人取醉不辭酬令節論交誰  
與話吾真清貧只欠營甘旨何日潘輿送喜頻  
聖主乘乾撫五辰調和玉燭靜邊塵生成共沐陽  
和澤熙皞均爲壽域人愧我詩篇渾漫興愛君襟  
抱本清真欲將一醉酬佳節百罰深盃肯厭頻  
東嶽文章仰北辰每憑珠唾挹芳塵當論盛代騷  
壇將莫出名家德水人心上澄空無俗物酒中踈  
放見天真陽春一曲誰相和擊節長吟感慨頻  
新元涉七即良辰醉卧田園絕市塵江上幾回今

夜月罇前減却昔年人悲來轉覺生如寄老去方  
知懶是真漏泄天機天自妬錦囊佳句莫頻頻  
今歲休徵卜此辰風恬日暖靜無塵祇應 聖德  
能調化要識天心不遠人令節歡娛他自得暮年  
踈懶我全真春來已轉亡胡月佇待西藩報捷頻  
兀兀窮愁恠此辰欲傾東海洗兵塵龍韜恨不輸  
奇策馬革徒然想古人遼薊干戈猶未定登萊消  
息苦難真由來主辱臣當死慷慨中宵撫劍頻  
涓埃無補聖明辰歸卧空林謝俗塵虛室草玄霜  
滿鬢清霄浮白月隨人自知燕石難爲寶敢把齊



竽久混真窮巷悄然知己絕唯聞山鳥啄門頻  
閉門飢卧動經辰藥竈烟消甑滿塵縱喜有山仍  
有水只憐無酒又無人炊沙作米終難飽綴露成  
珠豈是真看着早梅花欲吐雪中風送暗香頻  
空憐紫氣射星辰誰識奇才拔世塵交道拋來山  
作伴機心忘却鳥隨人潯陽種菊非元亮谷口耕  
雲是子真囊中藥物扶吾在肘後醫方點檢頻

送黃子由奉使日本

昔余登眺沒雲臺面勢平臨馬島隈大蜃嘘空海  
市出長鯨噴水雪山來乘槎漢客何曾到採藥秦

人亦不迴今日送君由此路秋風別恨兩相催  
舊聞秋浦使殊方是我高門大父行誓海奇文懸  
日月傲寒孤節冒風霜今君又渡扶桑水後史將  
增汗竹光第第一家聲秘不得島夷長誦檜山黃

次金仲文益熙韻

藉甚詩名重翻教泰嶽輕相思秋欲老兩地月俱  
明烏問青雲士誰知白雪聲看君赤壁詠應與古  
人并

附元韻

九月臨津渡西風錦纜輕雲根秋色老楓葉夕



陽明四座風颯詠長江袞袞聲良辰無樂事喜  
得二難并

和巴陵詩許公微

逆旅相逢地湖山滿意秋有官嬰世故無計作閑  
遊海月牽鄉夢霜風動客愁慙慙廣陵宰能得幾  
時留

次尹兄而遠鳴啟見示韻

昔有燕昭王千金買死骨金臺已寂寞事與浮雲  
沒嗟哉李謫仙攬海呼蒼天今古豈同轍滄海變  
桑田賢材代不乏莫道邦無人吾兄抱經濟默默

羞呈身榮落走不暇沉冥醉爲家三選樂有餘千  
鍾又何加中夜撫長劍胡塵暗遼海小醜不足憂  
扶顛大臣在大義亘宇宙千秋魯連知與我語慷  
慨不覺朝陰移何當揮健筆勒石燕然山相携欲  
請纓舉頭望長安

次鄭公達微韻

入眼溪山畫不如訟庭窳寂似郊居人稀曠野無  
烟火草滿前階絕簿書雲海彩樓蛟出沒月窓清  
影竹蕭疎若成句漏丹砂術駕鶴明朝上碧虛

禁中鎖直

時鄭兄維城在政院子由在騎  
首余在提院丁卯夏



令序香名冠古今賢兄羨譽重南金青蓬自愧聯  
芳樹碧桂皆能擢禁林俱衛 北辰清夜永共露  
東海 聖恩深分明丹鳳門前月直照三臣一片  
心

九日登高與黃子由聯句沒宋字韻

造物爲杼機風光互錯綜信秋懷何慄慄余髮亦  
種種好人事日相催佳辰古所用信新釀酌浮蟻  
嘉肴宰肥豚由迎霜晚菊鮮出岫孤雲縱信夕日  
照落木寒風振枯葑由落帽徵晉孟悲秋追楚宋  
信襟抱向誰盡登臨與子共由金蘭托深契玉樹

羅羣從信養拙歸田園休官辭祿俸由世味老愈  
薄詩料天所供信有羨河漢隔欲往丘山擁由徘  
徊詠離騷激烈歌商頌信更惜蕙蘭腓漸覺霜露  
重由無爲絕外誘有過要內訟信開口聊且笑刑  
足曾所恐由兵塵靜四隣亭運收三統信幸同牛  
放野敢圖風處縫由優游飽山水酩酊倒巾幃信  
過眼驚節序謀身愧愚菴由不吐丞相首肯結廷  
尉禮信人相幕間并神都控殺雍由蒲頭挿茱萸  
盈耳聞絃誦信幽興在深壑窮尋理輕韞由超然  
出塵區何須泛清灘信歸路暝色迷蒼茫地氣霽



由

城西與表弟黃子由舍弟成伯聯句沒秦  
字韻

吾君紹祖烈乘否轉為泰伯信新化尚淳儉舊染祛  
奢快好推誠及遐邇建極協無太伯成美琛來四夷  
精金收百汰信微臣起草野賤跡厠冠盖由但受  
聖明知不向公侯句成放逐謝軒陛縣翩解銀艾  
信散才宜止止吉士方譎譎由自分守丘壑無心  
走塵壒成寒花保晚節幽蘭閱芳韻信年往迫衰  
老歲暮繁雲靄由涼風日淒淒晴暉朝曛曛成歸

田事桑柘結舍栽李柰信豐登子不聊寒窶吾其  
奈由粳米此身小乾坤斯道大成觀魚貴忘機友  
鹿要遠害信山瘦露翠髻水落橫練帶由茲焉適  
素性曠然洗宿疴成苔逕踏青錢瓜園摘文貝信  
塔柳已摧凋池萍亦漂沛由行當絕人世不復憂  
狼狽成匣琴素塵鎖掩門荒草茂信幸逃物議非  
實露君恩霈由况復同志輩能成握手會成皎月  
照襟抱清芬襲衣襟信傳盃酒初釀分韻句仍繪  
由坐愛竹林靜徙倚松栢允成自可樂簞瓢何須  
節駟儉信剝肥持蠓螯切細登鱸膾由共採彭澤



菊不詠東坡檜成多君象山嶽愧我沉消澮信既  
得敢望蜀以微無譏鄙由筆陣儼壁壘詩料富倉  
廡成傷時心若熬吊古腸欲創信王風歎榛蕪俗  
情厭狡獪由倏忽吾生幾沉酣此樂最成身世兩  
悠悠毀譽莫識識信止棘有蠅營棲梧無鳳噓由  
賓鴻自宜真軒鶴徒翩翩成朱門臭酒肉白屋吃  
糠糲信仍思賢哲遠欲用椒漿酌由百年宇宙間  
萬事形骸外成紫塞願掛弓黃雲罷倚袂信蒸黎  
樂烟火氛霧豁對蒼由邦域登熙皞聖澤流汪濊  
成坐占太平象何憂小醜叢信所懼有遺筭是心

如懸旆由夏雹何凜烈秋雷且訇磕成天戒既昭  
晰廟謨空玩愒信往事存覆轍前言視靈蔡由低  
垂默不言鬱抑意無賴成窮陰催短景晚壑生虛  
籟信涼氣欲蘊肺秘訣如治癩由養拙辟強園垂  
竿子陵瀨成行吟歌浩浩起舞舒婉婉信心猿要  
制伏意馬敢奔駮由奧理豈難識明鑑自不昧成  
洗耳臨箕顛振衣濯清沫信魏闕費夢魂漢儀想  
旌由聖人祝多壽良弼帝應賚成

三節遺稿卷之二



三節遺稿卷之三

薪谷

詩

抵果川辛

御史

啓榮

追到

紀行錄辛未十月湖南巡

武御史時

征邁遲遲日欲斜  
 獨憑孤嶺唱離歌  
 銅津漸遠波聲小  
 玉律將窮暮色多  
 館吏逢迎荒野外  
 郡齋寥落古山阿  
 湖西御史來相會  
 共問郵亭路幾何  
 宿權汝固保家待舍  
 茅不至君家池館絕  
 塵氛方外難知世  
 未聞重到園林多



變態更開樽酒細論文天涯恍惚尋歸路日下  
蒼茫隔暮雲遙望廣陵消息絕鴈行中斷不成羣

午憩成歡次畸翁韻

古牆經雨長苔衣秋盡郵亭木葉稀征客不堪頻  
北望暮天愁思正依依

渡錦江望山城有感

山樓粉堞向江開王輦曾遊此地迴今日空餘  
流水在滿江烟月釣船來

宿礪山

浹旬秋雨歎羈遊始到湖南第一州遙望星辰環

北極不堪清夜倚危樓

到完山與府伯夜飲述懷

府伯即洪公賈

本來湖海兩浮萍幾處相逢醉又醒昔在原鄉初  
識面今來完府共忘形百年聚散身如寄萬事浮  
沉鬢欲星俱倚曲欄瞻北極終南山色夢中青

向金溝途中望金山寺

縹緲金山寺孤高迤太清山含九秋色風便暮鐘  
聲塵土幾年夢烟霞今日情尋真那可得王事  
有嚴程

抵秦仁



詩山一別夢相思屈指炎涼歲幾移  
皂蓋當年鞞印綬繡衣今日奉  
綸絲沙堤柳色重逢處板水  
橋邊再渡時惆悵披香亭畔路  
綠荷零落偃方池

留客館詠懷

去國旅遊遠流光同逝波風塵六太息天地一高  
歌秋至客心動雨餘山色多長安隔千里消息問  
如何

留淳邑考講諸儒

橫經試多士無處不遲留列郡同鄒魯諸生誦孔  
周菁莪霑聖化棫櫟屬邦休少壯須勤學人間

歲易道

與舍弟集相遇偕到潭府

兄弟相逢地高堂有老親君恩隨處在和樂滿  
家春

留潭府偶吟

遠客思歸切孤鴻正叫霜徘徊南斗外遙拱北辰  
傍

夜坐竹軒

秋入潘安鬢深知宋玉悲五雲天北極孤節日南  
陸地僻逢人少山高得月遲夜來無限意唯有此



君知

設慶席舅氏黃公奉母夫人時宰潭府舍弟集登第設慶席姨兄順天倅鄭德基內弟興陽倅黃子由皆參

頭上天花雨露香彩衣齊舞鴈成行欣逢 聖代風雲慶更祝萱堂日月長

別金士卓元立

萍蹤聚散水東流芳草年年恨不休他日憶君何處苦笛聲孤起夕陽樓

與客遊俛仰亭

千里承 恩爛熳遊繡衣仍帶醉鄉侯且携海內

無雙士來倚湖南第一樓晚木聲酣荒野濶晴雲影落畫欄幽箇中物色分留少岳老題詩在上頭

到玉果與南幼安夜飲

歲晚知交態如君復幾人相逢青眼舊豈作白頭新風雨孤城夜笙歌滿座春耽歡仍不寐盃酒亂無巡

宴廣寒樓醉後和王倅韻睦公長欽

廣寒形勝最南陲十里溪山畫樣奇地歷華夷三戰日天留長老百篇詩江湖水濶魚遊遠樓閣風微笛響遲徙倚曲欄秋月白酒罇茶鼎亦 恩私



名城控扼壯邊陲極目風烟特地奇芳草晴川崔  
顥句丹楓翠壁杜陵詩也知象外乾坤大可但壺  
中日月遲一物偏承 恩雨露孰云天道本無私  
暫憇月波亭次石洲題壁韻  
梅竹尋常見風泉最可聽應知他夜夢長在月波  
亭

歷過望海臺

城下滄溟萬里開獨携雄劍倚高臺天慳景物千  
年在地歷華夷百戰來落日流霞添逸興長風送  
月促深盃可憐統制招魂處海曲清秋盡角哀

留水營次壁上漢陰柳川兩相公韻

二老雄詞鼎可扛紗籠舊跡亦留雙陽春妙響真  
難和盡日沉吟倚北窓  
獨上高樓倚晚風叫霜孤鴈正浮空居人指點漁  
村近一抹炊烟落照中  
南樓豪興值秋風况是金罇酒不空半夜舟人應  
解意數聲漁笛月明中

宿松廣寺次壁上韻

獨訪蓮花境青山幾萬重徑危蒼蘚滑林邃白雲  
封月印寒潭水風鳴靜夜松神清無夢寐深省發



晨鐘

億萬恒沙罍壺中別有天客來花雨後僧語月潭  
邊松檜千年在香檀萬口傳平生勞夢想今日幸  
留連

逾雲月時

前登雲月時俯瞰白蓮峯蜀棧三千里秦關百二  
重路危愁日暮石滑怯霜濃知有東林近山風送  
夕鐘

自昌邑還到秋城竹軒詠竹進退格

一別秋城數月強夢魂長遠竹樓清今朝始得旋

征旆舊跡依然似故鄉喚友山禽應有意迎人野  
樹亦含情最憐蒼玉千竿在直節猶凌御史霜

送舍弟還洛

天涯行李一身遙客裏離君轉寂寥鴻鴈影連知  
幾月鵲鴿飛散即今朝清霄夢草魂長往白日看  
雲意自搖迢遞驛程千萬里願言努力慎征軺

登聯珠亭

客子來登縹緲樓可憐佳麗最南州千竿翠竹當  
軒出一帶晴川遶檻流暮雨自歸還冷落孤雲欲  
去更遲留江山縱美非吾土畫角三聲起百憂



到兵營逢冬至夜酌

故國餘千里天時動一陽  
片容還待臘梅意欲生  
香撫劍身將老逢辰意更長  
平生滿罇酒隨處任  
顛狂

望 闕禮後偶吟

去年今日在花輓粉署深嚴  
雨露邊劍履慣趨螭  
陞月衣裳猶帶數爐烟遙望五雲天  
北極可憐孤  
節地南偏轅門此夜腸堪斷  
畫角聲殘雪滿天

留水營登樓

一上危樓萬古情  
將軍鼓角動邊聲  
層波迥接扶

桑城大旆高褰細柳營  
逸氣却嫌天地窄  
雄心俯  
壓海山平何當直挂雲帆去  
倒捲滄溟洗甲兵

路上遇白景觀尚賓下馬小酌

逆旅相逢地湖山欲暮時  
臨分不忍別征馬故遲  
遲

訪李彬彬彬家是日大雪

客有山陰興尋君步屨輕  
開扉唯竹色凭几亦松  
聲白雪聞高調紅塵笑此生  
江湖滿罇酒肝膽照  
青萍

次咸平倅朴學魯日省所寄韻



華翰交馳數日程開緘却有故人情曾傷洛水橋  
邊別仔待咸原館裏迎想得江山供勝槩不妨罇  
酒樂昇平也知東閣詩囊富物色分留遲我行

到咸平客館次具景輝

鳳瑞所寄韻八韻

歲月消磨嶺海間驛亭秋盡葉聲乾空持繡眼宣  
新化幾見郎星憶舊官浮世白頭交誼薄故人青  
眼酒盃寬簷前細雨能留客門外花驄久卸鞍一  
榻論文忘日暮十年多病怯天寒嚴程有限還傷  
別愁緒無端不盡歡筆法已從家法正詩情豈與  
歲情闌懸知一片江南月他夜分明兩地看

靈光客館次壁上題詠韻

天涯客意浩無邊看劍中宵惜暮年風帶竹聲喧  
檻外月移梅影落床前三秋旅館人將老千里鄉  
書鴈不傳多少世間名利子古來誰似兩疏賢

長沙客館次板上韻

歲暮郵亭海氣涼風塵自笑客行忙朝開東閣梅  
如雪夜倚南樓月似霜陟岵幾穿千里眼搜詩空  
費九回腸百年憂樂皆如夢萬事悠悠酒一觴

過白癡僑居次韻

相逢青眼舊携酒敞華堂瘦竹凌霜葉寒梅戴雪



香江山供勝槩風月助清狂醉後憑欄睡忘吾物亦忘

次清絕堂韻呈主倅

風塵幾年別邂逅屬辰良壯志日千里萍蹤天一方山含雨後態梅動雪中香湖海滿樽酒清宵開小堂

過珠原金南家次壁上石洲韻

愛汝草堂靜心閑山鳥知慇懃一盃酒更贈五言詩

次谿谷韻

白雪今朝滿意晴野梅花發自分明嚴程有限吟情少畫角三聲駟馬鳴

留潭府見秋香詩軸次東谷韻

瓊臺雨色動微寒月桂天香也未殘碧落有情愁獨立明河無影夜倚闌嬌憑錦琴橫金鴈懶把羅衣繡彩鸞公子不來秋又過可憐風景好誰看

竹軒逢金晦雨

竹軒寥落古潭州青眼慙懃酒滿甌萬里行裝俱異地十年京洛昔同遊浮名聚散真如夢仙袂飄飄不暫留歸路若逢相識問繡衣兼得醉鄉侯



題南幼安壁

白雪千山暮清談一座春相看不忍別盃酒亂無  
巡

次美仲詩

渤澥之東蘆嶺南訪君今夕暫停驂幽棲剩覺塵  
緣少久住應知海味甘關外嚴程留不得客中離  
恨最難堪臨分更勉吾家業反顧要須日省三

金堤客館次板上韻

即臘月朔日

他鄉已遇一陽生驛路新梅眼忽明身在宦遊爲  
物役夢歸鄉國學躬耕江城石老千年色堦竹風

來半夜聲二十九年醒復醉自憐書劍兩無成

益山次尹伯奮

元舉韻

長安花柳昔同遊一別悠悠鬢欲秋雲樹幾年迷  
遠夢酒盃今日滌窮愁風烟縹緲湖山暮天地蒼  
茫歲月流浮世白頭交誼薄似君須向古人求

附元韻

我生擗散任優遊茅屋蕭條已覺秋制酒未能  
忘酒味安貧不肯作貧愁溪山獨立風烟晚宇  
宙狂歌日月流役役百年徒自苦悠悠身世復  
何求



遊寒碧堂呼韻

來倚寒山欲暮時西南地濶大江邊攔前翠色竹  
千幹雪裏清香梅一枝此夕親朋拚勝會幾年雲  
樹費相思勸君須盡滿罇酒明日臨分怯路歧

又次前韻

異鄉鍾鼓樂清時客裏相携別故遲已報窮陰消  
北陸始知梅信到南枝今宵把酒須歡樂明日停  
雲祇夢思唯有醉鄉天地濶回看世路信多歧

途中偶吟

歲晚行裝向玉京寒雲暮雪過孤城溪山歷歷來

時路村落依依此日情萬里乘驄人自老一年持  
斧事無成埋輪攬轡今難得千載唯應獨擅名

到廣程次畸翁韻

寂寥空館日初沉夢逐歸雲落上林分明丹鳳門  
前月直照孤臣一片心  
見說遼陽久陸沉紛紛胡騎獵平林醉憑長劍頻  
回首誰識男兒萬里心

途中口占

雪後詩情浩未裁銀盃縞帶逐人來雲山歷歷長  
安近關路依依客子迴去日秋霜破佳菊歸時春



信到寒梅故園松竹應相待懷抱明朝得好開

大殿延祥詩 課製錄

春臺喜氣自冲融 聖德承天似日中積雪先消  
上林苑瑞雲長繞大明宮句前自是陽和澤發育  
誰知造化功解道儒臣題帖義願言 恭已布仁  
風  
條風初發歲喜氣欲排冬 觀化宣三德行春屬  
九農發灰移舊管梅萼靚新容最是吾 君澤薰  
人似酒濃

大殿端午帖 已巳

至化無爲法上天五質呈瑞玉墀前周垣近接三  
階象魏闕平臨萬井烟 聖鑑何須明鏡鑄覃思  
已與惠風宣臣隣拜獻南山壽不用縈絲巧續年

大殿春帖子

清晨開紫闥仙仗襯紅雲掩鵲韶光早依微曙色  
分窮陰消北陸天樂動南薰春日山東詔千年頌  
漢文

願將牛馬放桃林偏向春臺雨露深豈但測圭占  
日影且須 觀化法天心初傳暖律發灰動旋覺  
道人木鐸音聞道有虞齊七政史家遺頌到如今



效建除體 散韻

建國負東海千年 聖人作除戎戒不虞重門復  
擊柝滿住有遺種往者大充斥平黃兩西民虔劉  
被鋒鏑寇果何人列郡俱辟易執爰不敢前曳  
兵徒自縮破敵無上策金繒終誤國危機雖暫安  
志士猶鬱抑成盟卷甲歸信然吹虺毒收兵抗大  
邦邊烽然不熄開門納凶渠幽燕氣甚逆閉帷讀  
兵略撫劍空歎息

今上岳陽樓 二十韻 排律

平生性癖耽歡賞老去尋真興更狂淮海清遊知

幾辦湖山宿債儘難償凌霄傑構臨湘水耀日璇  
題揭岳陽宿昔傳聞勞夢想暮年登眺訪風光自  
從鼙鼓山西動厭見兵戈隴右瘡避地秦州仍十  
載聞砧楚戶已三霜王孫芳草何曾歇客路殘花  
亦可傷見說三江真樂土還持一劍戒行裝中流  
洲號稱鸚鵡枕水臺名是鳳凰千尺茲樓最軒豁  
百年多病獨彷徨天文翼軫分躔次地理荆吳接  
畧疆俯瞰巴陵烟水濶平臨夢澤暮天長乾坤清  
濁還高下日月東西浴混茫鳥外峯巒浮一髮鷗  
邊舸艦簇千檣雲橫青草湖光碧秋入蒼梧野色



黃懷土每依南斗外  
戀君遙拱北辰傍  
蕭蕭落木玄猿哭  
歷歷圓沙白鴈翔  
客裏光陰悲代謝  
醉中今古惜興亡  
江潭舊宅憐騷客  
雲雨荒臺吊楚王  
徙倚曲欄歌宇宙  
愧無詩律撼瀟湘

禁庭應製七言二十韻

禁園佳氣毓三靈  
聖主明威惣四溟  
五夜鷄人催玉漏  
九重魚鑰啟金扃  
爐烟乍起朝儀肅  
曙靄初收燭影熒  
殿上衮衣瞻瑞日  
省中環佩聚文星  
風雲盛際同歡樂  
黼黻王猷煥典刑  
授簡溫綸遵故事  
修文正道法前經  
詞場衆技介揮郢  
藝苑

羣鋒刃發劂麗句  
真同天下白  
俊才皆似海東青  
賡歌稷卨追虞典  
文雅嚴終陋漢廷  
敢以浮華工篆刻  
要將諷詠督箴銘  
風薰舜殿聞仙曲  
日永堯階頌瑞賞  
筆落雲烟外  
御座詩成珠玉達  
宸聽優游壽域均  
天覆蹈舞臣隣祝  
華齡共沐恩波趨  
紫禁晚乘殘照出  
彤庭承榮悅隔前  
生事罷會猶疑醉  
夢醒擣藻莫耽爭  
白戰斬鯨還欲試  
青萍十年遼塞傳  
烽火一帶清川混  
濁涇忼悵何須懷  
鳩毒折衝宜速掃  
羶腥無忘在莒憂  
勤切願見安邊德  
化馨螻蟻小臣恭  
獻誠妄持布鼓助  
雷霆



癸亥元日書懷拾遺錄

飲罷屠蘇酒吾生又一年  
山容猶帶臘鳥語已回  
春卧病仍留洛佳辰倍憶親  
先陵如不祭誰尸莫  
繫纒

送鄭天經依舊字

好去天經甫迢迢路幾程  
花山春樹直松嶽暮雲  
平別恨添泥絮浮生逐浪萍  
相思千里月人在海  
邊亭

逢韓子平正則

我有峩洋曲平生爾獨知  
別來經六載相見有餘

悲叙舊渾如昨論亡淚自垂  
新春何以慰白酒滿  
金卮

自京赴江都

朝發長安陌雲端日欲昇  
稚僮衣凜冽羸馬足凌  
兢路積三冬雪江寒百尺冰  
故山松柏老揮涕過  
金陵

還鄉江都

行李逾金浦旬時到故鄉  
携幼還入室拜母復  
陞堂山色當軒秀春醪滿甕  
香竹君如待我依舊  
北窓傍



贈積石真師

法身清淨洞真機衣鉢相傳自祖師  
滄海木盃乘月渡碧空金錫踏雲飛  
衆香烟氣猶霑袖積石巖光尚滿衣  
預拂杜鵑峯上月杜鵑花發我當歸

送鄭公著

備戾洛

爾向楊花去東風一葉舟今朝辭燕尾  
明日到蠶頭窮海三春別長江萬里愁  
相思意不盡兩地月如鉤

遣興

江海春光裏新亭縱目時日斜禽語亂  
風緊鵲巢

危傍架齊書帙當爐洗酒卮平生一寸志  
唯有白鷗知

詠懷

聞京中新製太平曲志句及之

我生堪笑亦堪憐壯志蕭條二十年窮是  
士常寧  
棄守官非吾樂早歸田閑來採藥尋山裏  
忽復眠  
雲夢日邊聞道長安新樂府太平歌曲萬人傳

甲津送尹含章

元之

地分南北任浮萍塵世風波夢亦驚  
井浦勝遊難再辦甲津相別若烏情  
路從燕尾亭前去舟自烏頭水上行  
惆悵客中頻送客更堪江月渚邊明



三節遺稿卷之三

三節遺稿卷之四

薪谷

教書 不允批答

教忠清道觀察使俞伯曾書 課製錄

成周之盛蓋以東西陝而敷治有虞之隆亦咨十  
二牧而熙載矧今殷憂惕厲之日可無周爰咨度  
之臣瞻彼湖西地方實我海東天府有田舍廬廡  
之數素稱百濟遺基無山川險阻之形是乃四輪  
諸道當殲賊於稷野父老戴盆香而迎師逮駐蹕  
於錦江臣民挈壺漿而滿路比緣惠澤不究遂令



邦本或搖內浦則賦重年飢凋瘵濱死左道則人  
貧土瘠皆竊偷生意者守宰非其人抑亦按察曠  
厥職聞范滂之攬轡願以爲臣想賈琮之褰帷已  
矣難作徒然景慕於異代幸爾得見於同時惟卿  
美璞無瑕精金有勁丹書鐵券早著山河之盟粉  
署銀臺常近日月之曜方將鵬翥雲路少焉蠖屈  
雷封卧汲黯於淮陽非媿慙也任龔遂於渤海固  
欲安之民情雖切於借恂宣室式適於召誼重歸  
西掖振儒雅於花輶復入東銓參庶政於藻鑑書  
名屏上久置內廂之間屬望朝中可爲外臺之表

茲以云云予乃授以虎節孰云棄其鳳池秩視亞  
卿當藩垣屏翰之任責重專制有弓矢鈇鉞之權  
克體行葦之仁以布甘棠之化一夫失所以爲恥  
受牛必求其芻四境不治如之何牧羊先去其狼  
能以禮讓爲政必也使無訟乎今茲關市之征莫  
如斯速已矣徹桑土於未雨除戎戒不虞振杏壇  
之遺風變俗至於魯此其大畧也固難遙度而謀  
于心豈若親見哉允宜巡歷而運之掌過公山而  
無忘在莒臨沂水而益思朝宗罔俾荆南獨有謝  
夷吾專羨庶幾河北不讓狄仁傑知名罪大辟稟



予以裁官通訓任卿自斷於戲無替成命往慎職  
司予臨兆民若朽索六馬之馭卿勉一節勤沃轡  
四牡之馳

教成鏡道觀察使金起宗書

天道無爲而三光六行宣其化人主不宰而四岳  
九牧代其工所以難其人孰能稱厥職竊惟東國  
地理之險莫如北關天作之區當前漢置二府之  
時號稱平州都督逮高麗分十道之日仍隸朔方  
指揮複嶺虬蟠過鷄首秦地之百二層巒虎踞猶  
羊腸蜀路之三千臺隍接犬羊之墟邑里枕蛟龍

之窟金城關地人傳尹瓘之宏猷玉關宣威世稱  
許琮之壯略惟其暮夜之有戒至于今日而轉深  
蓋夷虜不情莫守黃龍之約而邦本益困方騰碩  
鼠之謠况近者互市之蕃戎亦猖然恫疑而虛喝  
凶狡西賊必待范文正而膽寒鎖鑰北門亦須寇  
萊公之心筭宵衣惕厲予安得斯人朝著咨詢才  
不借異代惟卿秉志端遜蒞事精剛玉帳運籌藹  
綠水芙蓉之氣鐵券紀績結黃河秦嶽之盟值戎  
虜之東寇受鈇鉞於西藩法崇文之勇決聞命卽  
行許諸葛之驅馳鞠躬盡瘁使邊頭坐而無事制



方面隱然有人北闕徵還蓋緣曾母之疾西民瞻慕益切岳爺之呼屬茲艱虞竊歎四郊之多壘奮于武衛宜作萬里之長城茲以云云犀節麟符屬中權之控制熊旂豹轟侈外臺之威儀文星映塞天之將星卿月臨成樓之闕月想軍民之雷動歡迎羽扇綸巾而道路之風傳快靚輕裘緩帶過龍潛之舊地念祖宗艱大之基集鴻飛之矜人嚴南北刷還之政所貴者勉盡實效不可以徒尚虛文化龍蛇而為民赤心宜置腹受牛羊而求牧蒼生可察眉振其文風期興魯教之禮讓磨以歲月

丕變秦俗之鬪爭忌戰必危慎四機五申之令以守則固恤六鎮三甲之兵倣漢塞之營田申畫經畧遵虞朝之考績黜陟幽明官通訓任卿自裁罪大辟稟予以斷此其機務之大略若夫潤澤則在卿於戲往慎乃司無替予命勞王事而不養雖抱獨賢之嘆念國步之斯頻庶盡共理之責

領議政尹昉三度呈辭不允批答

四序佐而歲功成八柱擎而乾維正况君臣相須成體而上下允宜協心恭惟我朝傳六七聖禮遇賢相非一二臣有若黃喜奮庸英廟之溫綸渙



發有若朴淳求退 宣祖之宸翰昭回前王不忘  
後嗣可法當今之世舍卿而誰雖古之人無出其  
右肆予卽祚以後於卿注意之深若救危棋待國  
手而活若作厦屋得工師而成爾有嘉謨嘉猷入  
告于內凡厥庶官庶政咸得其宜孤棘升賢予方  
得君之重公槐巽命胡寧忘我實多雖欲辭富貴  
功名獨不念宗廟社稷蒼天示警未孚對越之誠  
白屋多寃或有萇楚之詠山戎窺我灣上輦帛羈  
縻天兵屯彼島中船粟往哺時亂有如此者非卿  
無以鎮之惕厲宵衣常不安於丙枕矜式朝著庸

可休於午橋問疾親臨雖未遑於古禮遣官敦諭  
蓋亦出於至誠予不再言卿庶幾改

領議政吳允謙初度呈辭不允批荅

昔望諸君列國之臣燕惠王尚惜其去管夷吾五  
伯之佐齊桓公猶用之專况一身去留任九鼎之  
輕重萬目瞻仰擬百揆之模楷惡得暇逸乎哉要  
在勉強而已眇予叨此大位惟帝資以良臣貧賤  
不能移富貴不能濫展也大丈夫志君子有所恃  
小人有所畏蔚然真宰相才蓋精神志意之相乎  
故啓沃都俞之靡間源清則流潔如鑑之空如衡



之平本立而道生所操者約所施者博是以邦其  
永賴庶幾相亦有終雖予禮貌辭氣之間少失敬  
大臣之道而卿鞠躬盡瘁之義胡寧棄寡人而歸  
惟筋力或可以少休奈股肱無得與共理悻悻然  
見於面豈若是匹夫休休焉寔能容乃所謂君子  
薛居州獨在左右固難齊傳楚咻郭汾陽身佩安  
危何忍越視秦瘠予嘗閱前史而周覽未有如今  
日之殷憂天步初夷若顛木之有皂莖國事靡定  
涉大水而無津涯周餘黎民予遺加之以師旅仍  
之以飢饉虜情變詐百出喜則爲人面怒則爲獸

心誰能辦此事乎固無踰老臣者於戲悅賢不能  
亟見殆同一日暴十日寒圖治未得其方向異七  
年病三年又卿無卯酉之若唯當卧而治之予有  
乙丙之憂可以出而仕矣追先王之殊遇讓後  
人于丕時

左議政金瑬初度呈辭不允批荅

乾道高明上耀三階之象坤維博厚中盤五岳之  
形蓋君子並立爲三而人主圖任不貳唐虞雖遠  
都俞具載於典謨秦漢已還治亂亦繫於宰相矧  
今殷憂惕厲之日可無周旋匡救之臣肆祖宗



在天之靈資予良弼扶綱常掃地之運惟乃洪休  
日月重明社稷無隕多矣風雲交感造物陰來相  
之當屬者爲八座之初已蔚然有一世之望沉潛  
經籍修身在正其心吁咈巖廊治國猶運之掌左  
右宜咨汝翼緝熙永賴仔有不惟子惠困窮而拯  
民物於水火之厄亦復寅亮天地而措國勢於磐  
石之安方且垂拱仰成胡寧拂衣求退可仕則仕  
可止則止聖人雖謹行截國存與存國亡與亡大  
臣義同休戚惟予集木之惧殆同涉水無津而卿  
採薪之憂庶幾勿藥有喜毋堅遜避之志益圖康

濟之功問疾親臨蓋未遑於古禮鞠躬盡瘁須克  
讓於丕時勉追霖雨之賢垂法於後罔俾慶雲之  
詠專美于前

三節遺稿卷之四







